





1595

CL

h.º. Car. 17 12

60
50

4864

MANIFESTE

ET DECLARATION

DE LA NOBLESSE DE PRO-

uence contenant les causes qui

l'ont meuë de prendre les

armes contre le Sieur

d'Espernon.



M. D. LXXXV.

AT THE

WILLIAMSON

Case
F
39
1326
1595dy



XXXXXX

LETTRE D'VN
GENTILHOMME
PROVENÇAL SVR LE

Manifeste ensuiuant escripte de Lion
le 3. Nouembre 1595.

MONSIEVR vous verrez par le discours que ie vous enuoye comme le nom du Roy est honoré en Prouence, & recognoistrez qu'il le sera encores d'auantage maintenant que la reuocation faicte par sa Majesté du pouuoir par elle cy deuant baillé au sieur d'Espernon a esté mise és mains de monsieur de Guise Lieutenant general & Gouverneur pour sadicte Majesté en ce pays. Cela bien assésuré du premier de ce moys. Tous les bons François se promettét que ledict Seigneur de Guise assisté du S^r. Desdiguieres rendra dedäs peu de iours ledict sieur d'Espernon en mauuais estat. Et comme la noblesse Françoisse a bien fait en tous les lieux ou elle a serui sa Majesté à la reconqueste de son Royaume, celle de Prouence & des enuironns monstrera vne viue & entiere vertu. Vous auez bien sceu qu'en l'an mil cinq cents quatre vingts neuf incontinent aprez le

tresdetestable & execrable parricide commis en
 la personne du feu Roy Henry troisième (que
 Dieu absolue) le sieur d'Espernon usant d'une ex-
 treme ingratitude enuers la memoire dudit de-
 funct Seigneur Roy, de qui il tenoit toute sa nou-
 uelle grandeur, delaisa la vengeance de sa mort,
 & abandonna le Roy regnant, sans auoir signé
 la recognoissance qui luy fut faite par les Princes,
 Seigneurs, & officiers de la couronne au pied de
 la declaration que fit sa Maiesté à l'instat de son
 aduenement, & tint de fort mauuais propos cõ-
 tre sa Maiesté, en diuers endrois, mesmes en pas-
 sant à Tours, où parlant à aucuns des princi-
 paux officiers de sadiete Maiesté, & entre aul-
 tres à feu monsieur le Presidēt d'Espeffe tresZelé
 François il leur fit plainte des paroles qu'il di-
 soit auoir eu avec iceluy Seigneur Roy lors qu'il
 estoit Roy de Nauarre, quand ils passerent à Ier-
 geau & à Estampes pour quelques prisonniers &
 pour les capitulations: & voulant s'excuser de
 ce qu'il n'auoit signé la declaration, par laquelle
 sa Maiesté estoit recogneuë par lesdicts Princes
 & Seigneurs, il dict que Messieurs les Mares-
 chaux de France l'auoyent fait signer à d'autres
 deuant luy, sans qu'il en eust ouy parler. En quoy
 l'on peut ueoir s'il s'excusoit ou s'accusoit. Il ad-
 iousta à ces mots (mais fort froidement) qu'il
 estoit

estoit prest de seruir sa Majesté. Ce que ne luy
prouenāt d'abondance d'un bon cœur, il deman-
da aduis si le Roy pouuoit regner, y ayant entre les
Catholiques qui l'assistoient quelques vns (qu'il
cognoissoit) lesquels estimoient que quand il au-
roit fait de la ligue il se desferoit d'eux. Ces pro-
pos dictz à personnes clair-uoians faisoient bien
paroistre le feu qu'il couuoit, & quel desseing il
auoit en l'ame, & il ne se put tenir qu'il ne s'en
ouurist à gens de qualité. A quoy luy estant respō-
du par eux, qui n'estoyēt pas vlcereZ comme luy,
qu'il falloit que les Catholiques aidassent audict
Seigneur Roy à vaincre les ligueurs, & qu'en fin
il seroit le maistre, & leur scauroit gré de leur as-
sistance, & que s'estant fait instruire (comme il
auoit promis de faire au plus tost qu'il pour-
roit, lors de la recognoissance desdicts Princes
& Seigneurs) ou (comme il estoit Prince de pa-
role) il se reduiroit à la Religion Catholique
Apostolique Romaine, ou feroit des loix fonda-
mentales comme en Poloigne ou en l'Empire d'Al-
lemagne: Oyant ceste responce il feignit d'y pren-
dre goust. Vous auez peu veoir quelles estoyent
alors ses conceptions par ce qu'il a fait depuis,
ayant obtenu du Roy par importunité le comman-
dement en l'armee de Prouence aprez la mort du
sieur de la Vallete son frere. Quelques vns ont

voulu dire qu'il trouua entre les papiers dudit
 sieur de la Vallete des instructions pour la destru-
 ction de l'autorité du Roy affin de bastir vne
 tyrannie dans le pays. Mais n'ayant le defunct
 déclaré ces mauuais intentions, ains au cōtrai-
 re vne bonne volonté au seruice du Roy, il est ho-
 norable de le laisser en repos. Quant au sieur
 d'Espernon, vous cognoistrés par le Manifeste &
 Declaration de la noblesse Prouençale ce qu'il a
 pensé, ce qu'il a voulu, qu'il a dict, & en fin qu'il
 a commis contre le Roy & contre le pays. Ce que
 voyant publié par ce Manifeste sur ce qui luy fut
 rapporté que le sieur de Besaudun Gentilhomme
 de la prouince l'auoit composé, il s'en est vengé
 cruellement. Car comme ledict sieur de Besaudun
 fust allé à la guerre, son cheual estant tombé des-
 sus luy, plus abandonné de la fortune que de cou-
 rage, ayant esté amené audict sieur d'Espernon,
 il le fit inhumainemēt tuer quelque temps aprez
 sa prise, n'ayant voulu permettre qu'un prestre
 l'ouist en confession. Mais la liberté n'est pas mor-
 te avecques luy, & en reste encores d'autres non
 moins genereux que courageux, qui le feront vi-
 ure à perpetuité en la souuenance des bons Fran-
 çois, & qui dedieront & consacreront au temps
 ce que les mains barbares ne luy ont peu rair.
 Vous lirez beaucoup en peu dans son discours,

& y trouuerez les causes de la prise des armes
 contre ledict sieur d'Espernon viuement repre
 sentees, comme demonstrations escriptes de la
 main d'une franche verité. Cherissez donques
 l'auteur tant pour ceste marque, comme pour
 ses grands merites, qui sont tels que l'imitation
 en est autant souhaitable que difficile, pour auoir
 aussy valeureusement combattu les ennemis du
 Roy par les pointes de son eloquence, comme il a
 fort brauemēt abbatu par plusieurs fois l'orgueil
 de l'Espagnol & Sauoyard par le trenchant de
 son espee. M'asseurant que le tiendrez escript en
 vostre memoire, ie ne vous feray plus longue
 lettre, ains priay Dieu vous tenir en sa sainte
 garde, de Lion le 3. Nouembre 1595.

Vostre seruiteur affectionné,
 Cl. d. p.

[The page contains faint, illegible handwriting.]

1890



MANIFESTE ET DECLARATION DE LA

NOBLESSE DE PROVENCE

*contenant les causes qui l'ont meüe de prendre
les armes contre le sieur d'Espernon.*



LEST tres-certain que
le soudain mouuement
qui est arriué en ceste pro
vince aura produit diuers
effects dans les cœurs & opiniôs des
hommes, les vns en feront vn iuge-
ment, les autres vn autre, selon que
le vent de leurs passions & humeurs
les guidera. Les plus tranquilles sans
penetrer plus auant le fond de ces af-
faires condamneront ce remüement
& le blasmeront, comme vne nou-

uelle semence de troubles & diuisiōs,
 & diront que c'est faire rechoir ceste
 prouince auant sa totale guerison en
 vne plus dāgereuse maladie. Les plus
 subtils & clair-voyans louëront au
 contraire la diligēce de ceux qui ont
 preueu les perils auxquels ils voyoiēt
 tomber ce corps foible & languissant
 s'ils l'eussēt laissé occuper aux efforts
 de ce dernier & mortel accident. Par-
 my ceste foule encores il s'en pour-
 ra trouuer aucuns (en petit nombre
 toutesfois) qui beans après la proye
 de leur desolée patrie, & plus soi-
 gneux de recueillir le bris de son nau-
 frage que de luy tendre les mains au
 milieu des ondes & de la tempeste,
 detesterōt du tout les actiōs de ceux
 qui se sont iettez en pleine mer pour
 la guarentir. Mais sans doute ceux
 qui ont dās le cœur les viues impres-
 sions du seruice du Roy, & l'amour
 de

de leur chere patrie, esleueront iust-
ques au Ciel la hardiesse de ceste bra-
ue & genereuse resolution, laquelle
ayant esté prinse de toute la noblesse
de ce pays, ou de la plus grand part
d'icelle, elle a estimé estre de son de-
voir d'en publier les causes, & faire
voir clairement à tous la saincte &
iuste intention qui l'a poussee à se di-
straire de l'obeissance & commande-
ment du sieur d'Espernon & sauter
autre armes pour s'opposer à l'exe-
cution de ses dāgereux & pernicieux
desseings.

Il faut sainement confesser que les
graces de la bōté diuine ont esté spe-
ciales, & les effets de son admirable
prouidēce merueilleux en la conser-
uation de ceste prouince, durant les
troubles & calamitez de laquelle on
a veu tousiours reluire certain soing
de ceste supreme puissance en sa fa-

ueur, comme si d'une main courrou-
 cee elle luy eust voulu donner le cha-
 stimēt, & de l'autre pitoyable la tirer
 de l'abyfme de ses mal'heurs. Car si
 iamaïs il y eut prouince marchandee
 par les desirs ambitieux des gouuer-
 neurs ou Princes voisins, il semble
 que ceste-cy ait esté plus chaudemēt
 pourfuiue & avec plus de violence
 que nulle autre par l'ambitiō deme-
 surée de ces ames affamees & turbu-
 lentes, de sorte qu'elle a couru main-
 tes fortunes, & s'est veüe bien souuēt
 presque submergee dedans les gouf-
 fres de miserables seruitudes & tyrā-
 nies: mais dés que le bastimēt d'icelle
 s'est esleué & a sēblé prédre quelque
 forme & accroissemēt, Dieu en a per-
 mis tout aussi tost la demolition ius-
 ques aux fōdemēs plus profōds. Tou-
 tesfois à peine est elle sortie d'une ex-
 tremité, que bien tost après elle s'est
 veüe

veüer entrer en des perplexitez plus grandes. Soit qu'il ait esté ainsi expedient, comme si la conseruation dependoit de la diuisiõ qui a tousiours balacé & tenu en egalité les puissances des diuers partis, ou bien que le chastiment ordonné d'enhaut à nos fautes ne fust encores entieremēt accõply. De là est arriué que ceste pauvre prouince ayāt esté fraischement deliuree de la plus redoutable seruitude qui l'eust onques menassée, estāt eschappée comme miraculeusement des griffes rauissantes du Duc de Saouye nostre proche voisin lors qu'elle pensoit prendre quelque relasche pour respirer de ses miseres passées. Voila en mesmes tēps arriuer Monsieur d'Espernõ, lequel après le deces de feu mōsieur de la Valette son frere se seruant des troubles de la France, arracha du Roy par importunité

pouuoir de venir commãder son armee en ceste prouince. Car bien que sa Majesté eut entiere cognoissance de son humeur & portee, elle auoit tant de guerres sur les bras, & tant de traueses de tous costez, qu'elle ne peut pour ce coup vser de sa libre & volontaire dispositiõ, ains pour des considerations tres-notables elle se laissa cõme forcer à la violente poursuite dudit Sieur. Toutesfois comme Prince tressage & prudent, qui a le soulagement de son peuple en singuliere recommandation, il ne luy voulut iamais donner le gouuernement de ceste prouince, mais seulement le commãdement de l'armee, affoiblissant dextrement par ce moyen l'autorité de celuy qu'il cognoissoit trespasable pour l'vsurper plus grande qu'elle ne luy appartenoit, & luy donner aussi assez d'occasion de n'executer

xecuter les sourdes menaces qu'il fai-
 soit bruire de se rebeller si l'on ne le
 contentoit, pensant tousiours prati-
 quer les anciennes coustumes d'ob-
 tenir des Roys toutes choses de hau-
 te lutte & par la viue force. Les gen-
 tils-hômes qui auoyent seruy le Roy
 sous le commandement de feu son
 frere, craignans des remuëmens &
 nouuelles alterations dans la prouin-
 ce si ledit Sieur auoit du mesconten-
 tement, pource que les gouuernemēs
 de plusieurs bônes places estoiet en-
 tre les mains des Gascons, pour re-
 trêcher toutes occasions de troubles
 escriuirent à sa Majesté en faueur du-
 dit Sieur, lequel ne peut nier que à
 son arriuee & depuis il n'aye tous-
 iours esté assisté desdits gentils-hô-
 mes & de plusieurs autres qui se re-
 mirent au seruice du Roy, avec toute
 l'affection, obeissance & fidelité que

si le Roy mesmes y eust esté en per-
 sonne. Mais il n'y eut gueres seiourné
 sans descouurir tout aussi tost les hau-
 tes conceptions qu'il auoit dās l'ame,
 & les estranges desseings qu'il y cou-
 uoit (Car les violentes & demesurees
 ambitions ne peuuent estre dissimu-
 lees ne trouuer aucū voile qui les ca-
 che) deslors l'on commēça à remar-
 quer en toutes ses actions & depor-
 temens le proiect particulier d'une
 domination absolue & souueraine,
 en ses lāgaiges publics le nō du Roy
 y est tousiours entremeslé, mais en
 particulier il tiēt plusieurs propos tē-
 dans à alterer la deuotio de ses suiets,
 & mal seans à la bouche d'un officier
 de la Couronne, & de celuy qui a si
 fauorablement esté esleué en tant de
 grades, richesses, & dignitez par la li-
 beralité des Roys, ce neantmoins il
 se fert du pretexte du seruice du Roy,
 prostituant

prostituant l'auctorité d'iceluy à l'establisement de la tyrannie proiettee, plusieurs personnes d'honneur & dignes de foy pourrôt tousiours tesmoigner les pernitiex discours que ils en ont ouy à leur grand regret & desplaisir, & personne n'ignore que parmy tous les traittez qu'il a faits pour composer les troubles de ceste prouince il a tousiours offert dans les articles secrets de supprimer le nô du Roy, & si a donné à ceux de la ligue de plus grandes esperâces encores. L'interest du Roy estoit enuers luy la moindre difficulté, pourueu qu'en son particulier il se peust establiir & auctoriser. Bref il fit sentir tacitement a chacun que nul ne pouuoit estre bien ne s'aduâcer aupres de luy, qu'il ne fust mal avec le Roy, & se resolut d'en oublier du tout le nom. Mais recognoissant qu'avec vne si

dure & iniuste condition il ne pou-
 uoit posseder les cœurs des gentils-
 hommes, & qu'ils se rendoient extre-
 mement agards & retifs a ses illicites
 recherches : il proposa d'aller pour-
 suiure l'assurâce de ses desseings ail-
 leurs qu'en leur assistance : en execu-
 tion dequoy il enuoye chercher des
 appuis, & contracter des alliances &
 confederations en Italie, & en Espa-
 gne avec les Princes ennemys de sa
 Majesté . Chacun sçait le voyage de
 l'Euesque de Mirepois en Italie, & le
 suiet d'iceluy . Chacun sçait que l'a-
 gent dudit Sieur a esté veu à la Cour
 d'Espagne traitant d'affaires de gran-
 de importance . En mesmes temps il
 commencé à gronder, & se ietter sur
 les pretextes de religion, figurant &
 soustenant la conuersiõ du Roy im-
 possible, il s'empare violentemēt des
 meilleures places de la prouince, &
 sur

sur tout de celles qui auoient rendu plus de preuue de leur fidelité au serui ce du Roy cōme luy estās plus suspectes & moins asseurees, y faiēt construire de fortes citadelles aux despēs du pauvre peuple, qu'il escorche & ronge iusques aux os: pour en paracheuer les desseings y establit des gouuerneurs de sa natiō, la plus part gens de petite qualité, pour les rudoyer plus cruellement que si c'estoient villes cōquestees à viue force sur quelque ennemy barbare. Quant à la noblesse il la priue de toutes charges, honneurs, & authoritez, s'efforce par tous moyens de la raualler, & luy oster le credit & le courage, la gourmande par langaiges picquans & iniurieux, la mesprise par contemances altieres & desdaigneuses, l'esloigne du tout du maniement & cognoissāce des affaires. Ceneātmoins

la force l'a contrainct de l'assister, & le seruir à ses despens, veut qu'elle luy soit attachee à la botte, qu'elle se ruine près de luy & qu'elle n'en bouge, & toutesfois il ne veut en maniere quelconque l'honorer, ne recognoistre tant soit peu son merite. Si elle veut prendre aucun party ailleurs avec les seruiteurs de sa Majesté il s'y oppose & se declare ennemy mortel de ceux qui le font. Bref il ne veut cōsentir qu'on s'employe à autre chose qu'à l'infame seruitude à laquelle il la veut assuiectir. Mais si d'autre costé l'on veut considerer les oppressions du peuple, quel discours & quel loisir faudroit-il pour représenter les rigoureux traictemēs qu'il en a receus, qui auroit la patience & le courage d'exprimer par le menu les insupportables foulles qu'il en a souffertes, qui pourroit raconter les excessiues impositions

positions que ledit Sieur a faites, les innumerables sommes de deniers qu'il en a exigé? Ne peut on pas asseurer avec verité faire toucher au doigt, & prouuer par tesmoignages inexpugnables qu'on produira en temps & lieu, que la despenſe qu'il a faite dans la prouince en vne annee, les moyens qu'il en a engloutis & consumez excèdent tout ce qui c'est despendu depuis le commencement des guerres iusques à present, sans q̃ pour tout cela il en soit reussi aucũ seruice cōſiderable pour sa Majesté, ou pour le repos de la prouince. Oserons nous dire que les dons & presens qu'il a faits en vn an par assignations sur le peuple de sa propre authorité extraordinairement & par dessus les impositions ordonnées pour la guerre sont arriuees à la somme de deux cēts cinquante voire trois cents mille escus?

Toutesfois c'est chose tres-veritable,
 & qui se peut voir par les ordonnances
 & mandemens qu'il en a faict. Qui a
 iamais ouy parler d'une prodigalité si
 monstrueuse & immense, qu'une province
 des plus petites du Royaume ait esté
 contrainte de surmonter les plus grandes
 liberalitez des Roys, apres tant de ruines &
 desolations, & que cest excez encores
 soit une des moindres parties des des-
 penfes & extorsions qu'elle a souffertes
 depuis sa venuë? Pauvre province, quel
 peché, quelle faute ta renduë si coulpable
 que d'auoir encouru une si rigoureuse
 punition, qu'il ait fallu que le fleau
 vniuersel de cest estat florissant ait esté
 vommy par ce grand corps dans tō giron,
 comme vn venin contagieux aux extremitéz
 par une vertu expulsive de la nature,
 affin qu'il exerçast contre toy sa der-
 niere

niere rage & fureur ? quel tourment plus cruel te pouuoit affliger, que d'estre condemnee de saouler par l'espuisement de tes moyens, ceste auare & insatiable faim, que la liberalité des plus prodigues Roys, que les finances opulentes de la France paisible n'a iamais peu assouuir ? quels thresors & ruisseaux de richesses auroit il fallu pour desalterer ceste inextinguible soif, que les moyens, la substance, & le sang du peuple tant de fois succé par ceste sangsue, n'a iamais peu estancher ? Si nos predecesseurs auoient escrit ce que nous auons veu par les effects de ses desbordemens & despeses inestimables, nous en reputerions le discours fabuleux, & ce que nous en laissons a la posterité ne sera peut estre pas receu pour veritable. Car d'affirmer qu'un pays si sterile & si petit que la Prouence, après

le rauage d'une guerre de cinq ans la plus cruelle & desbordée qui se veit onques ait sur ses derniers abois peu payer envn an trois ou quatre milliõs d'escus en subsides & impositions au Sieur d'Espernon, & que outre cela les soldats ayent vescu à discretion, & pillé indifferemment amis & ennemis avec toute sorte de licẽce, & que les rauages ayent presque esgalé les deniers, Si l'on n'auoit en main de quoy le monstrier il vaudroit mieux s'en taire, que d'auancer vne chose si excessiue & incroyable.

Beaucoup d'autres choses resteroient à dire des deportemens enormes & damnables desseings de ceste ame audacieuse qui a prins vn vol si haut sous l'aveugle faueur d'une fortune desbordée, qui presume rien au mode ne luy estre impossible, ne rien de defendu, & q̃ tout ce qui est sous
le

le Ciel luy doit obeissance & hommage. Mais il suffira pour le present d'auoir remarqué succinctement les poincts plus importans, & faire cognoistre à chacun par ce petit eschantillon le surplus de ses actiōs violentes & reprouuees, & de là nous tirerons de viues raisons & argumens infailibles, pour conuaincre & condāner la lascheté de ceux qui seroient si mauuais seruiteurs du Roy, & si ingrats nourrissons de leur patrie que de ne s'opposer de pieds & de mains aux perils de leurs vies à l'inuasion de ceste dangereuse peste. Quant à nous ayant bien consideré toutes ces choses, & preuoyans la suite de mille inconueniens encores plus dangereux, nous nous sommes ressouuenus que les tiltres que nous portons, les honneurs & bienfaicts que nous & nos predecesseurs auons receus des

D

Roys, l'obligatiō naturelle que nous
 auons à nostre Prince, la pieté que
 nous deuons à nostre patrie, nous
 conuioit à mettre la main à bõ esciēt
 à ces affaires, sur lesquelles ayāt sou-
 uent consulté entre nous des moyēs
 pour y paruenir, & examiné saine-
 mēt les raisons d'vne part & d'autre,
 en fin il a esté resolu que ceste mala-
 die se rendoit peu à peu incurable, &
 que le seul remede d'icelle ne se pou-
 uoit trouuer qu'en la pointe de nos
 espees, & qu'il n'y eut iamais guerre
 plus vtile, plus iuste, ny plus honora-
 ble que celle cy, ou l'vrgente necessi-
 té & seruice du Roy, le soulagement
 du peuple, & la conseruation de la li-
 berté commune nous portoit. Que si
 l'on nous veut accuser d'auoir prins
 les armes sans l'expres commande-
 ment de sa Majesté, & mettre en auāt
 qu'on pouuoit rechercher de plus
 doux

doux remedes que recourre à la violence, Nous respondrons que la seule consideration du bien de son service nous a fait prendre ce chemin plustost qu'un autre. Car si nous eussions commencé à proceder par voyes de plaintes, & requestes à sa Majesté, cela n'eust seruy que d'enaigrir d'avantage le Sieur d'Espernon, & l'occasionner à se roidir d'autant plus en ses entreprises, à l'execution desquelles nous l'avons reconnu tant obstiné & vehement, & si mauvais observateur des commandemens de sa Majesté, qu'il ne pouvoit pas entrer en nostre pensee qu'il eust iamais voulu obeir à ce qu'il luy auroit ordonné au contraire de ses desseings qu'il n'a iamais voulu interrôpre pour consideration quelcôque, ains plustost violer & enfreindre la trefue en plusieurs poincts & articles qui pouvoient porter quel-

que desfaueur à ses affaires particulie-
res, ores qu'ils fussent tres-vtiles pour
le general. Quel preiudice dōques au-
roit receu le Roy si pour nous plain-
dre des oppressions que nous rece-
uions, nous eussions esté cause que le
Sieur d'Espernon craignant que sa
Majesté ne le reuocast, eust d'autre
costé faisi (cōme il estoit en son pou-
voir) les meilleures villes de ceste pro-
vince, & mis dehors les bons serui-
teurs de sa Majesté? Pouuions nous
entrer en ces termes sans encourir vn
merueilleux peril, ne le Roy pour-
voir à nos plaintes sans mettre ceste
prouince au hazard, attēdu les trou-
bles & emotions ciuiles desquelles la
France est encores agitee? N'a il pas
mieux vallu que nous l'ayons preue-
nu & surpris, que de nous laisser pre-
uenir & surprendre? N'a il pas esté
plus expediēt pour le seruice du Roy

&

& pour nostre repos, de l'affaillir plu-
 tost que de le menasser, & rompre
 les chaines qui nous tenoient liez,
 pluost que d'entrer envne servitude
 perpetuelle? Ne sçait-on pas qu'aux
 maladies extremes, il y faut des reme-
 des hazardeux, & que lors qu'il s'agist
 de grandes & perilleuses entreprises,
 il les faut pluost executer que met-
 tre en deliberation? Tāt s'en faut que
 nous puissiōs donques en ceste leuee
 d'armes soudaine & inopinee offen-
 ser le Roy, qu'au contraire nous sou-
 stenōs luy auoir rendu en cela la plus
 digne preuue que nous pouuiōs luy
 produire, la plus deuote offrāde que
 nous luy pouuions presenter de no-
 stre affectiō & fidelité, & qu'il recoit
 aujourd'huy les deux plus signalez
 seruices qui luy pourroient estre ren-
 dus par toute la France, le premier en
 ce que vne prouince des plus impor-

tantes de son Royaume est garentie
 des mains du Sieur d'Espéron l'un
 des plus dangereux ennemis qu'il ait
 parmy ses suiets : l'autre en ce que la
 principale ville du pays, vne Cour de
 Parlement , & vne infinité de gens
 d'honneur qui tenoient le party de la
 ligue par le moyen de ceste esleua-
 tion ont trouué les moyēs de s'ache-
 miner & renger en seureté sous l'o-
 beissance de sa Majesté: La conuersiō
 de laquelle les y auoit desia du tout
 disposez, & riē ne les entenoit esloi-
 gnez que l'apprehēsiō des rigueurs
 & vengeance du Sieur d'Espéron:
 de sorte qu'en prouince de la France,
 le nom du Roy n'est auiourd'huy tāt
 honoré ne reueré, ne sa puisāce plus
 fermement establie qu'en ceste cy.
 Exemple qui portera coup à tout le
 reste de ce Royaume, & qui fera re-
 fouldre ceux qui sont encores chan-
 celans

celàs à la recognoissance de leur Prince naturel. Au reste nous auons tant de confiance en la bonté de nostre Roy, tant d'esperance en sa clemēce, tant d'asseurance en ses rares vertus, que nous nous promettons d'estre non seulement aduouez lors qu'il aura escouté nos iustes plaintes & doleances, Mais que de sa grace encores, il nous deliurera entierement. Car il n'appartient qu'à ceste royale & victorieuse main d'arracher du tout les liens qui nous tiennēt encores encores enlassez dans les nœuds de ceste dure tyrānie, & pour faire mieux cognoistre la syncerité de nos sainctes & iustes intentions en attēdant tousiours plus amplement la volonté de sa Majesté, Nous auons voulu recourir à Monsieur Desdiguieres comme l'un des plus signalez seruiteurs que le Roy ait, & auquel le merite de ses

longs & remarquables seruices doit auoir acquis plus de créance, affin qu'il espluche tellement nos actions, & esclaire si biē nos deportemens, qu'il en puisse faire vn rapport veritable à sa Majesté, qui ne scauroit trouuer vn tesmoing plus fidele ne plus capable des affaires de ceste prouince, ou il a faict beaucoup de voyages, & plusieurs exploits d'armes notables, pour la conseruation d'icelle. Et cependant pour mieux paruenir au but ou nous visōs recognoissāt les grāds malheurs & calamitez qui nous ont affligé à cause de nos querelles & diuisions, nous nous sommes resolu d'oublier & mettre sous le pied toutes nos anciēnes querelles & inimitiez tant particulières que generales, enseuelir du tout la memoire d'icelles, & nous vnir tous ensemble pour le seruice du Roy, & sous son bon

bon plaisir, d'un si ferme & estroit lié
d'amitié qu'on ne le puisse iamais rō-
pre ne desnoüer. Et avec ceste belle
vnion nous implorîōs l'aide de Dieu
premierement, & après l'assistāce des
gens de bien & d'honneur, tous les-
quels nous conuions au labeur d'un
œuure si sainct & si loüable, à la par-
ticipation d'une gloire si précieuse.
Car où se pourra il trouuer d'assez di-
gnes couronnes pour honorer la ver-
tu de ceux qui auront entrepris vn si
haut dessein que de vouloir esbranler
ce grand Colosse de fortune qu'on
reputoit indontable, & que person-
ne n'auoit encores osé attaquer?
Quelles louanges pourront digne-
ment exalter la valeur Prouençale
d'auoir eu la hardiesse d'assaillir ce
cœur audacieux qui mesprisoit les
Roys, & que toute la France redou-
toit? Se peut il entreprendre vn acte

plus recōmandable aux gens de bien,
plus digne de memoire à l'aduenir,
plus vtile au seruice du Roy, ny de
plus grand merite enuers Dieu & les
hommes, que de renuerser ceste ty-
rannie qui vouloit desmembrer l'au-
thorité Royale, perpetuer la guerre,
les massacres, & les desordres, englou-
tir nos biens, raurir nos libertez & rui-
ner à iamais nostre pauure & desolee
patrie. Courons dōques tous ensem-
ble d'une mesme volonté & consen-
tement aux armes, prenons tous la
cuirace d'une braue & opiniastre re-
solutiō, pour ne la quitter iamais que
nous n'ayons restitué à ceste prouin-
ce l'auctorité du Roy, q̄ nous n'ayons
chassé les desordres & l'oppression,
que nous n'ayons deliuré le peuple,
que nous n'ayons racheté au prix de
nostre sang la liberté de nostre pa-
trie, pour la ranger entierement sous
la

la doulce & legitime domination de
 ce grand & inuincible Monarque,
 nous ressentans trop heureux que
 Dieu nous ait fait naistre sous son re-
 gne : Et par mesme moyen ioignons
 tous ensemble nos tres-humbles re-
 questes & supplicatiōs, affin qu'elles
 ayēt plus de force & de vigueur pour
 flechir sa Majesté à nous octroyer la
 deliurance tant heureuse & desirée: Il
 est impossible que ceste ame gene-
 reuse qui a tant esté doulce & pitoya-
 ble à ses ennemis vaincus ne soit es-
 meüe du miserable spectacle des
 maux qui affligent ses plus fideles su-
 iets, & ne vueille dissiper les tenebres
 de nos miseres par le Soleil resplen-
 dissant de sa benigne & royale faueur.

F I N.

172



